

摛藻堂四庫全書薈要

集部

欽定四庫全書叢書要

集部

御製詩二集卷四十五

六

詳校官原任編修臣徐立綱



欽定四庫全書薈要卷一萬三千三百七十二集部

御製詩二集卷四十五

古今體一百首

甲戌一

甲戌元旦

泰階園煦麗青陽綺勝椒盤總發祥歲肇三元欣首祚  
閏逢旬九恰初章共球小大來侯甸衣食根源厘雨暘  
五福斂時啟敷錫春臺寰海祝豐穰

新正試筆

首歲開新甲三陽轉始寅部章幹元籥星紀肇昌辰禮樂迎黃道衣冠會紫宸勅幾勵恭已熙績在勤民瑞旭纔昇曉祥風欲報春秩宗襄乃職祈穀逮初辛

新正二日降旨加賑去歲淮徐被水州縣詩以紀

事

木德初革甲民艱切體乾念彼淮徐間災餘實可憐宣房亟就功黃流始歸川次第事疏築期多涸洳田春耕縱不誤冬寒信其然棣通陽德昭萬物欣陶甄一方鴻

鴈集寧忍憇視旃椒屏綿几張南望心為懸加賑頒新  
綸愷澤因時宣詎啻行故事還殷祈有年

循環曲

小往大來吉大往小來殃心安身勞逸身安心勞傷少  
聞多言吝多聞少言良衆非一是短一非衆是長財聚  
民散悔民聚財散慶

五君子歌疊舊作韻題鄒一桂畫

曰草曰木雖無情一葉一枝各具性寓意不留皆合宜

玩物忘返斯為病玉磬主人創此格想見當時拈筆興  
竹風流自蘇門阮松瀟灑即谷口鄭凌波水仙鯉騎高  
踏雪寒梅詩儻孟古栢擎空獨矯矯又如玉局持身正  
勅倣恒因寓渴賢向曾命張若靄亦倣此圖藝歲亦可通為政

偶興

觀書偶興懷晏子使乎楚進橘併食之王或謂其魯晏  
子前致辭聞之賜人主爪桃乃不削橘柚乃不剖叶誠  
有如是義當於食前舉謫智益見卑文過曾何補

每接江南督撫奏報水退田涸不誤春耕旣用慰  
念兼恐飾聞

江北淮南刻繫心秋災展轉到冬深始聞燒草宣房築  
旋盼裁秧澤國臨米價街頭踊免貴田功町畔耦堪尋  
此音聽已私增慰還慮寧無飾匪諶

張宗蒼萬峯層雪

陶鎔謝氏賦中句損益曹家畫裏皴

石渠寶笈藏  
曹知白雪景

猶憶

臺懷白雲寺排窗一例玉嶙峋

題定武蘭亭帖後

虎卧龍跳正復奇流觴曲水想其時無邊感慨一篇具有數文章千古知

檢校繩聞褚遂良旋教王匣伴文皇戎溫無賴千秋恨  
豈礙經天日月常

松雪書宗不可當十三跋出十三行恰如身到瀛壺裡

澗草巖花總異香

其相讝

石中金星如青金龍尾皆有之而玉則未之前聞  
偶因製器得茲蘊金易稱乾為金為玉斯乃天然  
其相合德者耶輒以為韻而系以詩

誰知出璞已中更揀沙藏未見山經紀難窮物產良圓  
如湛秋宇點似綴星芒觀德資鉤控天然金玉相

新春養心殿

蒼龍轉玉牛紫禁闈青陽金甃蓂葉舒綺殿梅英芳奉  
時欽體仁祈歲願屢祥開年百務簡惕夕一心強好惡

戒已私詩書挹古香疇咨竚有翼勅命勵無疆

錢選桐陰撫琴圖

動操四山皆響然傳神真擅雲川錢一時把卷銷春燭  
認取和平是大絃

偶倣趙氏合璧卷各題以句

枯槎密篠離披間以詭石參差不擬刻楮求似頗兼作  
篆行之春意昌昌有脚化工蕩蕩無私水晶宮道人曰  
昔者吾亦如斯

右趙孟頫枯樹竹石

吐雲春靄靄寫月夜娟娟最是相宜處一家眷屬連

右管道昇竹石

不難石白與筠青仲穆神襟未易形恰比鷗波坡渚側  
幽蘭雅合是同馨

右趙雍筠石幽蘭

題張宗蒼雪景

奇峰詭石玉雕鏤飛閣還憑素練流點綴天然成迥句

不須燭照費冥搜

新春重華宮侍

皇太后宴

西望瑤池近羣迎

王母臨歡同萬方養春始九重深屏綴延年篆笙調太

簇音六鰲蘭作談百寶霧成陰入畫元朝慶

每寫歲朝圖稱慶

徵詩吉字吟瑞霧飄喜氣

天意即人心

是日微雪

王如意

竹化分真幻銅函閱古今清談常在手樂志每如心擊處珊瑚碎掛來蘿薜深握君曾得號禪德亦留吟貞素標瓊質指揮延藻襟休徵願時若詎為寶球琳

新春瀛臺即事

開正行樂合瀛蓬漢樹唐花試治融韶景幾分春勝裏朱樓一朵翠雲中昨來歲序殊新舊資始乾元協雨風過眼寸陰求日益關心萬姓祝年豐

視事旣畢自南臺御冰船凌太液遂至瓊華島登

臨瞻眺雜詠誌賞

封事凌晨畢閱披公卿次第接疇咨穉春悅可尋吟眺  
漫聽新歌坐玩時

淑清泉石淑而清竹鼎瀝壺事茗烹篩牖嫩陽攬韶秀  
徘徊真覺稱其名

冰凝太液鏡光煊輾輾舵床坐渡來聲襍排門鳴爆竹

權輿帝里是春臺

細霧昨日玉攢團積素峯直北看怪底重裘猶覺怯

椒園鐘梵落高寒

承光高殿鬱參差玉甕澆春想昔時只有檜松仍好在  
東風旭影上罘罳

春陰瓊島正堪憑憑淑景層楣瑞靄凝仙木綺錢增吉兆  
五風十雨願休徵

閱古樓

三希堂法帖石刻既成作延樓於瓊華島之西麓

嵌石壁間用期貞固因名曰閱古而繫以詩

寶笈三希萃法珍好公天下壽貞珉樓飛四面開屏障  
神聚千秋足主賓不雜羸劉誇博廣略存魏晉要精真  
游絲燈影參元契大塊文章沉澣津

畝鑑室

有序

閱古樓之北樸室三楹周以步檻後臨方塘引古  
井之水源源不竭視日下春明所載自金水河轉  
機運軒至山巔者事半功倍矣

方塘開一畝樸室得三楣古井新成記春明昔費辭松  
頭浴月影藻面漾風漪幽致今朝別當前冰鑑宜

蘇軾偃松圖向曾命張照題詠幾暇展閱因用其

韻

神以行之氣以載與真松不毫釐改玉局邈矣如晤談  
况綿几曾供奉在一剎那頃俱胝知喜其書亦味其詩  
春音大地蓋筦倪徐視謾謾圖間吹

養正四詠

書無逸於勤政殿屏風時自警也更效長康法為  
養正四圖於下六十條內足師法者多以限於屏  
數且擇其最精云

寢門視膳

寢門虔問視日三念在茲食察寒煖節體詢安否宜大  
舜慕五十孟氏稱孩提西伯仁人哉由來因此推立愛  
千秋法錫類百王基

丹書受戒

歸放馬牛已勤思天保定齋三受丹書端冕東面聽軒  
頃道無奇曰敬勝義勝休惕銘席端如臨師保命君鑑  
詣殊途外王本內聖

弓矢喻政

弓矢少所習自謂能盡妙叶得弓漫稱良弓工曰非好  
於弓猶失之況於理之貌更宿命京官政教勤探討絜  
矩勵實行文皇信有道

樂受格言

洛中有逸士徵聘來殿庭鬚鬢已皤然何異角里生兩  
言實得要敬佩書諸屏迂儒陳禮樂方士談蓬瀛淺言  
至理賅不愧學行名

題項聖謨摹韓滉五牛圖再疊前韻

采采相忘水石閒黃鐘韻滿胆鳴間青桐居士今知勝

虎賁中郎枉慕艱

故大學士蔣廷錫有摹項聖謨五牛  
卷以未得見韓滉真蹟自題跋語中

深致企慕今三卷先  
後俱入石渠寶笈矣

蕪得王羊不脛閒

韓滉卷已  
先入大內

千年一瞬靜披間居然十

五牛來牧恒亦因知穡事艱

詣齋官

肇祀勤民衣食源儀鍾郊偈引金軒齋宮預日來虔宿  
早見青雲擁

帝垣

詣

壇視

位肅常儀玉陛三成圓中規退即莊居還靜憩寸陰窗

影有餘思

祈穀禮成述事

玉梯廿七攝齊升奠璧拳拳若弗勝大禮躬行今十九  
洪禧永錫冀雲仍鳴球聲引羽干舞燎火明通翡翠燈

三白雖霑跡

優貺退瞻遙岫起雲縉

新正十一日奉

皇太后幸圓明園之作

金根肅駕撰良辰上苑行時先聲早春

去是月十三日立春

萬歲千秋申慶疊龍花燕樹奉

歡巡元冰鏡浦凝堅璧素雪鱗塍積薄銀盈尺亟祈霏

六出邇來問夜又教頻

曲宴外藩

例事懷柔不可刪朝家外戶屬瀛寰有來嘉客或姻黨  
用洽歡情值燕閒舞就魚龍春艷發酒行杯肇露瀼頌  
渠搜又有新歸朔錫宴均教預末班

時準噶爾台吉策凌等舉部內屬以

未出痘先遣其宰桑和  
統等入觀亦命預宴

甲戌立春日春帖子

舒疊陽交泰羣雍物喜春載洛京兆尹敬事出耕人  
瑞旭騰樓紫祥光煥勝青上林春似海作壽祝

慈寧

律分昨夜與今朝迎面風來果是條底識春園絕勝處  
冰花火樹湊初韶

錢選三蔬圖用舊臣高士奇題韻

留下尋那見草堂三蔬展尚欲生香熾然一切有為法

了識何曾者箇忘

士奇別業在西湖之陽地名留下今已鞠為蔬圃矣

離披畦畔復籬根淡味端知勝碩豚偶憶湖西親所見

綠含烟甲濕黃昏

王堂侍從暫家居博古餘閒學圃蔬此意足驚俗耳目

不堪兼致絕交書

士奇詩題於家居養母時跋中有日食一菜自甘不足為外人道語又趙

孟頫絕交書真蹟亦其南歸時所攜有舟次題跋今俱入大內

## 元宵前夕

玉輪將滿玉霄清燈事先看燈夕迎百道魚龍朝絳闕  
雙騫鸞鳳下銀瀛苑中自足烟花景牆外還聽鼓吹聲  
也識還淳在敦儉同民樂可驗民情

元夕燈詞

魚鱗傍晚淨天邊麝魄騰輝入夕妍放光明裏最明夜  
十三度中初度圓

年年嘉夜奉

慈歡御苑春宵了不寒寶閣便成無量壽琉璃界道瑞

蓮端

一綫烟光百道隨踏歌聲裏影燈奇排當總要呈新巧長此安窮語可思

幸際熙春宜共樂也思敦俗務無為奉時中有權衡理一節猶難念在茲

燈舞旋成蒼韻字炬輝真演法王輪如來住本光明藏那識人間今古春

金鳴銀雁時飛集綺閣珠樓乍有無花裁去聲吳綾綴千

樹女夷神術問能乎

九華雙炬照長樓  
樓上仙人來往遊  
今歲看燈有新使  
孜孜益凜固金甌

人人都喜此宵晴  
月放光華燈放明  
我獨心殷盈尺雪  
東郊將達舉新耕

上元後一日小宴廷臣疊去歲韻

乘時行慶喜如前  
列座欣開翰墨筵  
歌舞要因逢泰世  
賡颺同願遇豐年  
摛毫得句都成錦  
按例張燈不費錢

侯鯖集錢氏納土進金錢買放兩夜燈今十七十八夜也夕色樓西遲月上分明舊

### 歲景韶妍

碧琳宮闕蕊珠林花放恒春萬朵簪燈繼上元燃不夜雲憐韶節皺輕陰漫言育物同民樂那解長年望歲心咨爾百司各勤事青郊于耜倏將臨

### 冰燈聯句

有序

星橋火樹三五初過閨苑鰲山大千同照喜華簪之畢集開綺宴以聯吟片片鮫冰吐清輝而交璧

月行行龍燭騰寶燭而燦珠杓用製新題筆徵前

例詩賡五字巡協九成

御製巧匠注冬水新樣呈春燈耀含乾離象

潛移丁癸精藏陸傳所記納凌詩可憑博同蚌胎

潤臣傳恒鏤比蟬翼輕暗激金瑣碎晴搖碧瓏玲既

濟體互變臣保來

御製重明德交瑩陽燭舒燰絕陰火燐晶熒移置龍門境

懸將鳳閣楹朗晃照綺席高下流繁星無妨鶴談

暖臣史貽直或放蘭烟騰傳來柑借艷撒去荔同瀉酒

盞琥珀凍

臣陳世倌

御製辛盤水晶盛鸞鳳離奇出寒暄妙合凝製奪丁緩詭

光煦離婁晴碾月旋逾薄迎風閃偏清候經大小

雪臣阿克敦用倣短長檠自具剛健質獨抱澹素情就

范捐雕琢

臣蔣溥

御製葆光泯虧成霏雪若葱嶺蒸霞擬赤城朝炫龍銜樹

宵張蠟綴瓊林韜炎官傘花獻楚國萍蛟宮俯幽

迥由敷貝闕瞻搪擣潭秋淨一鑑塔夜洞九層捧

珠鮫綃覆

臣表曰修

御製為樓蜃氣橫撥蕊輝錦朵架閣憑玉凌義城非海外

方壺出郊坰城池接遙采車棲慙孤青不夜百枝

萃臣劉綸長春九華擎明明遊佛國的的環瑤京球

琳爛陳序

臣介福

御製茵苜儼在瓶準儉酌奢得南油西漆并張彖名言繹

陳烈正義繩虛涵剪水靜綺簇飛霧增暈隨眼波

纈臣嵩壽條並頭銜稱列侵凝蟻避融怯老狐聽鶩

管挿檐溜臣觀保

御製魚鱗垂瓦稜光明通體徹色相因心澄真入琉璃界

恍展雲母屏颺彩翥赤翅迴芒梳素翎金豆篩密

影臣彭豐玉釵叩清聲晞陽指寧冬耐冷裏詎懲畫

開扇上蝶臣董邦達

御製書映囊中螢能幻濕為燥還因晦作明皎皎夜珠映

煜煜銀盆升柱詠劉處士鍚鎔耿先生紅綻葩並

茲臣錢維城白瀉永欲傾兒童掌欣拍傖父目共瞠燭

調豐歲兆臣金德瑛

御  
制  
杓轉陽德亨可知即  
是火非無不治冰觸緒靜悟契  
應節興歡徵

連朝

連朝雲重宇傍午靄霏春作勢纔輕點徐停復暗淪再  
堅寒浦凍未改遠山皴佇覽攢團意優霑奠厚仁

雪正月十九日

灑灑密灑復濃霏  
新歲纔知喜氣歸  
天與園亭增麗景  
節留燈火作寒輝  
纈林乍欲舒荑萼  
積巘遙疑隱翠微  
五日春迴霑六出  
及時符甲澤青畿

燕九日觀燈詞

玉蕊火蛾紛纈眼  
晨晞宵問略綵懷  
漫言三五堂堂過  
燈夕今來第一佳

百道虹光駕漢飛  
天花更散玉霏霏  
絕勝旬九今年好  
滕六翩來宴處機

絳闕龍銜碧海珠瓊葩銀樹鬱葱扶夜深蟾魄依然上  
還道清妍得未孤

燈燃雪裏光偏朗雪舞燈前態越飄青女素娥真解事  
勾留婪尾艷春宵

馬和之四皓圖

肥遯商顏物外遊出山畫策自留侯司勲卓識空千古

不擬安劉擬滅劉

卷中題者數十人率元明間名蹟其論四皓類以避秦安漢為言識力無

能出杜牧右因題是詩為之拈出嘗謂詠古者宜具卓識若杜牧者似之然盈之不廢自是高帝意所素定無

藉四老翁調護力也不然當楚漢相持時於太公尚請  
分一杯羹果令牽於溺愛其廢盈而立如意何所顧惜  
豈留侯諫叔孫太傅以死爭舉不能得而獨驚此四老  
人謂羽翼已成有是理耶蓋高后同起草昧盈其長子  
且無失德高帝之不廢盈於義自正右袒之禍非所逆  
料楚歌楚舞宮闈秘事安從而傳之遷史多喜奇術其  
紀留侯事尤多怪然則此四人者得非圯上老人赤松  
黃石者流耶詩題于石渠寶笈成書後俟入續函舊題  
稱二楊今惟老鐵一篇楊載五言未  
知何時割去惜無從覓真蹟補完耳

### 題馬和之袁安卧雪圖

雪卧不知寒袁安貧果安筆耕千兔禿皮相五羊單處  
塞完名易逢亨踐行難和之繪高節詎止供吟看

# 蓬島瑤臺雪中即景

瑞景離奇寶鏡開  
鏡中樓閣是瑤臺  
三壺玉積長青栢  
萬樹花裝不馥梅  
徐福漫驅千戶去  
子登常按八琅來  
紐芽孽甲知何許  
驗取心田茲道荄

## 賦得西山積雪

東皇為玉戲  
粉繪展遙屏  
汗漫凝寒靄  
威紵接窈冥  
巒皴連漢白  
峰隱挿霄青  
愛凭當西牖  
無殊據勝亭

香山最高

處建標曰西山  
積雪為亭對之古香曹氏軸逸韻謝家庭別有忻懷處

甘膏遍麥町

詠文木

有序

安西磧海中桐樹成林枯皮剥落埋流沙經數千  
歲取以為器或作屏風有天然谿壑之形視中山  
所賦有斧鑿痕矣

萬里流沙遠千年老樹沈嶧陽同貢篚纓下異成琴密  
理埋塵蝕麤皮積雪侵自然呈物象久矣謝春心擁腫  
非無用葱青憶布陰子山今不作誰與暢元音

曉春萬壽山即景八首

試燈纔罷曉春臨  
咫尺湖山一暢心  
拂面峭寒生積雪  
西山又喜作輕陰

松峰翠湧玉嶙峋  
今歲行春樂是真  
潤浹土膏違舒疊  
良農暢好事畊畝

觸觀入畫濃纖別  
到處吟詩筆研隨  
也識人將嗤率易  
自惟結習未能離

長虹亘渚接雲涯  
不斷靈源泛細澌  
一棹玉泉原可到

今朝姑置待他時

峰縈水抱樹周羅玉積西山近幾多若向詩中論品格  
清新開府合同科

石舫天然凍浦邊片帆不掛纜常懸春風鳬雁千層浪  
秋月菰蒲萬頃烟

倚巖構築得層樓面勢昆明萬景收我意獨欣雲外賞  
人來羣擬畫中遊

寄暢名園愛惠山亭臺位置異同間屋臨流水吟澄照

雅似九龍片刻閒

山陰

山陰雪未消結攬曉春朝月斧修輪瘦天花綴樹嬌水亭依諸腹松塢出巒腰蒸旭輕嵐吐吹颺積素飄乍如張北苑可以傲餘姚訪戴乘豪興高風詎覺遙

清可軒

倚巖詰曲構閒房生色瑤屏滿屋張竹秀石奇參道妙水流雲在示真常天花不礙一牀落仙草真成四季芳

今日行春絕勝處銀塍罨圃兆農祥

澹寧堂

澹泊水之德寧靜山之體山重水複處書堂適構此喻  
義因名堂嘉言徵蜀史大用不窮人由衷知其裏

題惠山園八景

有序

江南諸名墅惟惠山秦園最古我

皇祖賜題曰寄暢辛未春南巡喜其幽致攜圖以歸肖  
其意於萬壽山之東麓名曰惠山園一亭一徑足

諧奇趣得景凡八各繫以詩

載時堂

橋東為堂爽垲奧密兼有其勝風漪瀾縠泛影簷  
際

背山得勝地面水構閒堂階俯蘭苕秀簷翻綺縠光對  
時欣職殖撫序勅幾康玩愒曾何謂分陰惜不遑

墨妙軒

曲徑迤東疏軒面勢辟間石刻翠墨留香有望古

遙集之概

兩壁貞珉勒千秋寶炬垂古香曾不竭心正實堪師春  
鳥芝文印風漪筆陣披蓬源契神解豈必定於斯

就雲樓

抗嶺岑樓每當朝暮晦明水面山腰雲氣蓬勃頃  
刻百變

因迥為高易對山得閣幽有窗納蒼蔚無地幻沈浮行  
素今兮古蘿軒春復秋宜居忘世者繫我足先憂

澹碧齋

樓南閒館俯瞰遠碧流憩之餘神心俱澹

齋俯綠瑠璃澄觀會莞倪藻淵潛赤鯉錦浪泛文鷺淡  
月銀蟾鏡輕烟絲柳隄忘懷此小坐還似對梁溪

水樂亭

繞池為園亭在嶧南洞庭廣樂恍然遇之

石泉真可聽絲竹不湏多聲是八音會徵為六合和非  
闕肖西浙乍似遇東坡羣鶴神仙侶還來按舞嗟

知魚橋

水樂亭之東長橋卧波與秋水濛梁同趣

屢步石橋上輕儻出水遊濛梁真識樂竿綫不須投子  
我嗤多辯烟波匪外求琳池春雨足青藻任潛浮

尋詩逕

過就雲樓而東苔徑繚曲護以石欄點筆題詩幽

尋無盡

巖壑有奇趣烟雲無盡藏石欄遮曲逕春水漾方塘新

會忽於此幽尋每異常自然成迴句底用錦為囊

涵光洞

徑側多奇石為厓為竇深入綫天層折而出彷彿  
靈鷲飛來

窟窕神仙府嵌寄靈鷲峯光涵千舍利青削萬芙蓉芝  
徑繚而曲雲林秀以重只疑丹竈側佺羨或相逢

初春遊玉泉山

及雪看山色尋春到水源華舟原可泛韶節最堪論池

館稱清寄詩書悅性存真幽供靜賞豈必在穠繁  
泉氣常蒼蒼春雲復冶融雙松千載外萬景一窗中向  
日莓苔綠入波樓閣紅移乘南國候宿靄鎮濛濛  
水複山重處畫情詩態邊數聲上松穿嶺霧牒石度溪烟  
奇遇忽於此春光已可憐冠峰亭上望千里玉為田  
新景宛宜賞故山殊可過春泉呈鏡縠曉月漾眉娥蘭  
芷輕梳沼瓊英尚綴科向題成隔歲隙影迅如何

棲霞室

雲深有精舍蒼蔚試披行映日渾成綺賡歌漫擬卿幾  
曾讓荷浦常自寫松楹適在山蹊下惟疑望赤城

漱瓊齋

臨泉褰荔幙迸水上苔磯淨響真宜耳寒光欲濕衣魚  
恬心不躍鳥惜影忘飛王濟曾何謂於斯辨是非

真珠船

室舫俯弄真珠雲容水態堪娛欲詢因學所得較來此  
義何殊

張宗蒼雪漁圖

津逮富春嶺規模七里灘羊裘亦何藉浩氣不知寒  
偶倣倪瓈喬林詭石并題以句

有樹槎枒有石嶙峋高低不約任天真踈皴竭倣無多子  
却憶吳淞江畔人

異同

無逸周書語無為周易辭無為近有逸無逸鄰有為有  
逸無為凶無逸有為私一聖言豈背一心理奚持同異

異同間達者深長思

正月晦日作

年華荏苒迅居諸又報靈蓂盡落除積雪全消地增潤  
條風微扇物含舒燈闌已識節無住閑後偏欣靜有餘  
景麗幾閒適值此還淳返樸每厘予

御製詩二集卷四十五

欽定四庫全書薈要卷一萬三千三百七十三

集部

御製詩二集卷四十六

古今體一百十八首

甲戌二

易字

新書易舊新還舊凡幾更書始愜心習字故知如是可  
求人毋乃背遲任

讀史

春秋紀載半真偽盡信寧無義至精校卜自緣君意定

區區何繫杜鵑鳴

春日樂壽堂

境託智仁德堂開翰墨筵古香研道秘新藻發春妍砌潤苔痕嫩冰消波影鮮行時際韶秀與物共欣然

再題惠山園二首

稍加位置力便足石泉佳秀木喬籠屋清流曲抱階風  
松入操古春鳥和去聲音諧烟雨錫山景悠哉寄雅懷

逕入紫芙蓉石林重復重臨溪開月戶隔樹落雲峰聲

擬洞簫按形參襄錦淙宣毫將側理到處有清供

自石舫進舟由玉河至靜明園溪路流覽即景成

短言五章

石舫前頭畫舫移湖心猶凍碧琉璃一般氣候參涼燠  
兩字禪機悟即離

一棹明湖倚艤輕經冬鳴雁任縱橫蘆叢亦可安棲啄  
笑彼瀟湘邁遠征

卧波玉竦接長堤舟過前川逕向西伊軋機聲雜鳴鶻

分明江國景堪題

雪消宿潤浹溪田  
溪畔人家低野烟  
于耜相將力南畝  
誰歛田畯為生憐

靜明山色望中新  
及到原來箇裏人  
大意略觀便言返  
寧母遲待羽林臣

玉泉山即景

烟霞表裏因心靜  
天水空澄觸目新  
啟迪詩懷涵萬象  
陶鎔山色入三春  
輕雲過午魚鱗疊  
積雪晞陽螺黛皴

低町聲去高田連近遠所欣一例利耕畊

竹鑪山房

隔歲山房此一過試泉偶爾樂天和悅心得向恒於是  
夏鼎商彝較則那樹鳥鳴春聲漸暢砌苔向日綠偏多  
靈源不凍輕舟繫簷際漪光鏡裏波

分鑑曲

清灘遠渚繚而萦渌水隨方鑑影呈可識谷阤足天趣  
那將離合繫人情月波激灔金為色風瀨琤琮石有聲

閒倚曲欄俯澄照水精闕裏息心旌

題楊凝式韭花帖真蹟

名翰留傳謝韭花軒軒舉欲擬飛霞馳情詎為盤餐計

乞米流風本一家

董邦達萬木森秋

凸者稜稜凹者窪經霜錦繡絢嶮崿最高更置孤亭迥  
縱目因之意與遐

夔磬

黎綠呈瓊寶神髓寫異形五城難論價九德早揚聲庇  
穀徵多稔葆光出太寧徒觀夏擊物喜起企虞廷

春日承光殿

祭屆春祈轉法宮崇基路便御橋東永消太液呈溶漾  
景入芳辰漸治融石秀松蕤清賞外新題舊詠靜評中  
明當遷坐遊觀戒咫尺軒墀得憩躬

是日遂遊瓊島趨臺諸勝即景雜詠八首

節前瓊島我曾登惜少銀花積翠凌此日行春御園返

雪消欣看暖霞蒸

假山溫樹續嵯峨仲月風光已鬯和  
永戲迴看曾未久滴瀾堂外激新波

心耽翰墨足淹留每到偏欣閱古樓  
通會重拈過庭語神詮一論照千秋

蕉園迤邐命輕輿永不勝牀舟礙諸  
未肯湖心事椎鑿多人勞作每塵予

鬱葱雲裏聳瀛臺麗日和風寶扇開  
何必龍鱗將翠羽

壺中木石總仙材

長隄東轉粉牆過院號淑清倣軸邁若向溪山論本色  
繫予意向此間多

茶舍三間背綠筠竹鑪雅合案頭陳松風蟹眼聊清課  
喜是收來雪水新

稅枯和淖向妍韶遺蹟猶堪指勝朝太液池邊人字柳  
春來還嫩舊時條

題張宗蒼吳山春曉

新紅嫩綠繢韶妍  
融以烟霞靜且便  
竹裏軒樓心太古  
源中阡陌意神仙  
錦蹊徐蹀探花騎  
練渚輕浮放鴨船  
都是南巡曾歷覽  
流陰瞥眼忽三年

趙孟頫幽篁戴勝圖

降柔傳月令如簣詠風詩  
何事辭雙侶翩然借一枝  
劇觀得神際遙想掞毫時  
磔裂陳纏地恒新墨妙垂

詠漢玉屏風疊舊作韻

弘璧夷玉兩序間三棘六異千年右  
諸侯良寶無過斯

詎若寶賢以為友孚尹比德時或珍如乾六爻無一偶  
玉屏方廣遺炎靈撫之光澤不留手溫室秘賞閱三朝  
寓意匪誇弗脛走東坡至人有至言世人安得如汝壽  
星為含譽雲為卿我則成詩今復久爾時書題借詞臣

前詩作於丙寅命學士  
張若靄書鑄紫檀架上

自審臨池腕力醜彈指凡八異

春秋重吟聊命墨卿黜琬琰終合付鑄華咄哉瓊質滄  
桑守章草鍾隸已瞠乎那能更進辨科斗聞之七日集  
靈臺王母帶垂靈飛綬雙成子登侍東西觴酌麻姑所

進酒詠諧白髮乃小兒瞿瞿何來竊窺牖交梨火棗仙  
得食斯以贈帝帝拜受什襲百代天府琛好惡何常惟  
知誘餗人遺製在周官筆翰休論類楓柳

春仲

社稷壇

玉輦行西闕

松壇祭仲春質儀遵古昔農事重躬親雅樂依聲永太  
羹不和醇拳拳何所願

綏我屢豐頤

御門日作

黃閣封章待縹音  
明廷駁對詰晨臨  
疇咨晝接寧惟是  
典禮時修更欲尋  
三九期餘常蜃念剛柔異克不容心  
遑云撫蒞茲年久益覺憂勤與日深

讀淮南子

智過萬人謂之英  
智過千人謂之俊  
設於林林蠹蠹流  
縱過億萬非哲濬  
使遇其智相敵者  
一人已難無過分

英俊惟名智亦殊刻舟求劍失鎔刃璧之披圖閱超光  
不求之馬終無駿

題錢選觀梅覓句圖即用其韻

梅有仙風鶴道姿一家眷屬得相隨孤山我亦曾過訪  
流水行雲憶昔時

玉檠

林邑品猶重咸陽製太奢難書欣質樸習字伴年華長  
短何須較球琳匪所誇羲經如玩象大有兆維嘉

題張宗蒼山水

玉泉百道劃巖飛春氣濛濛欲濕衣高士行吟何所得  
石橋獨自杖藜歸

仲春萬壽山雜詠六首

邇來春色夫如何乍見山陽綠草多都識流陰曾不住  
返躬却復慮蹉跎

表裏湖山景不窮楊絲漸欲受東風六橋迤邐知何處  
祇在輕烟淡靄中

如酒新波萬頃翻鏡邊遙見鳳凰墩何必湖心較西子  
澄觀會處合忘言

種松擬種丈尋外拱把成陰久待遲為學固知戒蹣等  
求才亦復貴乘時

曲廊繞柱度潺湲蹀步松風石瀨間此是惠山真面目  
輸他鐘磬六時閒

水複山重致益奇流連每自戒逾時無過大意觀忽遽  
却笑何須爾許為

萬壽寺

路便訪雲林禪房靜復深講筵下馴鵠春樹有鳴禽席展今來座題看昨歲吟偶嘗香積味益切已飢心

樂善園

溶溶新水初勝舟碧川寒峭襲輕裘璧社菱絲正相若忽憶南巡成昔遊沼園咫尺聊停憩泉石閒饒濛濮意輕茵已是春工夫喬木全成詩景致小徘徊旋命蘭輿高閣度置方披書箇中每覺玩不盡佳處常留興有餘

過玉棟橋

明當啟蹕謁

橋山此日清宮夙駕還  
迤邐棟橋過玉馬漣漪春水漾  
銀灣迴翔鳬雁心倉喜新茲蘋浦意總閒韶景方欣偏  
融洽輕雲又見羃辱顏

錢維城寒齋對話圖

萬玉聲敲颯沓風茅堂對坐地爐紅高談不涉人間世  
疏乞無懷商榷中

慈雲寺

精藍路左建多年一時炎官肆燻灼陸渾山火擬韓詩  
護法天龍竟何若花輒辟立雲構摧瓦礎荒榛起寒雀  
往來每為惜頽廢尋思此事應斟酌毋乃榜嚴語如是  
生滅滅已寂滅樂

過潞河

亨衢警蹕仗逶迤晴日東風度潞河已覺當春渾可望  
大都隔歲一為過暖融茵草生陽㟁水先去聲桃花下凍

波

追遠省耕應春月行時誰為玩芳和

曉行

詰旦命蘭輿曦輪猶未上須臾煥扶柔銅鉢隔林晃春  
氣每作霧郊原色曠暎設謂霧在日坐井觀乾象日天  
三萬里世界同瞻仰貞明豈有晦拘墟見非廣澄氣届

曾泉麗照清霄朗

白澗行官晚坐

春甸縱睇寬春宵了不寒數椽聊可憩一晌未遑安風  
月佳今夕詩書伴古歡短檠羣籟靜理趣愜澄觀

薊州道中

廿里楊街不覺遙淡烟融日近花朝應緣谷口春冰解  
已有新波到野橋

郊原土潤不生塵雅似江南薊北春通閨節遲耕未舉  
桑林醉社是閒人

溶溶春水下鳬鷺柳色輕黃染未齊分付田盤好相待

秀韶深處定留題

獨樂寺

時命重修落成路便臨憩

葺修尚識統和年龍象重教煥法筵詎有廢興繫白業  
徒聞翰墨說青蓮佛殿匾相傳為李白書 往來幾為飛吟興布施  
非闕種福田小憩便教清蹕去我非樂獨祇憂先

題翠雲山房

雲外遙瞻翠嶺橫到來翰席澹懷清螭亭倚巘攀松上  
蜃牖臨川數聲上騎行入座韶光發新藻隔林山鳥試春

聲招提路左青蓮宇幾杵蒲鐘太古情

月

籟息一房間月上諸山靜徘徊銀漢虛掩映松杉影烟  
花勒春寒石泉印清景澹然如我心值此神明境

恭謁

東陵各成短句

兩世恩勤被

澤深

昭西卜兆識初心無垂簾蹟功開國不數周家有太任

右昭西陵

世祖

聖祖皆受

文皇后

鞠育深恩

皇祖祇承

遺命因即

孝陵之

西為暫安奉殿明樓寶城恭上陵名本

皇考登極後乃建初志也

大定戎衣

世德昌勤民圖治日維皇

孝陵佳氣垂千祀兢業心殷勗觀揚

右孝陵

皇祖多年孝養誠

母儀形管播芳聲

元宮闕久山陵附來往霞標護赤城

右

孝東陵

緯武經文千載獨守成開創

一身肩攀

鬢尚憶髫齡際電影流陰卅二年

右

景陵

奠謁儀成路轉西椒漿坐釅意含悽中年傷感紛多矣

兩歲春秋又迅兮

右 孝賢皇后陵前歲安奉地宮茲二年矣

桃花寺行宮作

半山竺宇古招提高館閒房構近西詭石蒼松皆恰當

每來點筆為留題

桃花寺側花朝度却值山桃尚未開識得仙源真趣者  
不孤春色是今來

石泉咽凍淙聲細山鳥知春試語竒月牖凌虛千嶂入  
率教神解得於斯

曲折廻廊路轉通疏軒遙在翠雲叢開襟霄漢延清矚  
奇趣還同宋考功

花朝

三分春節已平分柳未舒條花未芬了識九旬真電火  
空傳萬事似浮雲青旗錦勝都無藉白水蒼山亦可欣  
小憩琳宮參淨業向來憂樂任其紛

靜寄山莊

松塢雲莊迥絕塵無妨紅路駐鑾頻嵐飛生翠常疑雨  
峯有真姿不藉春花未胎含因閨遲去聲蕪縗芽紐向陽  
新圖書靜好當清暇汲古心知未逮津

韻松軒

風樹皆作聲四時茲不改何處而乏松名山松所在佳  
會不常遇是吾所以乃謾謾雖無心落落若有待山中  
今亦古人間春似海

對瀑

摩窯扁石鑄垂紳聲色不動惟天真分明畫錦記內語  
中心藏之如此人

千尺雪

倚巖架白屋開牖臨清泉春半雪已消垂流尺計千一

二二而一圓方方復圓寓物陳至理隨會含神詮茗椀不必試吾方意油然

得概軒

敞軒稱得概勝日欲賅春松色迎人翠峰容入戶新不須花爛漫雅愛石精神與物欣芳節矧吾志體仁

暖

入山景物渾融和昌昌春緒來逶迤緋桃綠李縱遲待峰色泉聲漸已多封中出雲輕似波其上遙空巔黛螺

何當為雨潤新壠叱牛應聽農人歌盤之中盤之谷窈  
窕而深繚而曲樂以天下憂以獨春風風人吾意屬

### 小石城

磊磊拳石無央數攢簇累積堅城固屹然壁立開闢來  
世人安得知其故荆凡得失紛經營坪墳櫻守終誰成  
烟霞乾闔此示幻飛泉為壑松為旌松籟泉聲相激越  
楚南偶似非豪放子厚離憂何有哉石城同一滄桑閱

婉孌草堂

有序

是處面臨石城背枕雪瀑烟霞蒼蔚之狀與泉石  
相問答山莊最佳處蓋不一二數屋中適張董其  
昌婉變草堂圖真蹟輒以名之

奇境每奧秘時為幽人開我雖憂勞者亦有烟霞懷枕  
漱寄遐託溪山期靜諧香光圖婉變同然先得哉名相  
天下公會者任取裁識此慕蘭心企彼希李材其昌識語有希

李營丘  
之意

半天樓

肩輿徐陟衆峰巔恰得橫樓號半天不盡崇懷期太古  
自然迥句會當前松稱無改春偏態竹不多情月亦娟  
卉欽仙風吹萬慮祇饒鐘韻隔雲傳

雲林石室

石出壺天寬林開精舍迥嵐靄朝暮變松石今古永依  
階有綠苔問樹無紅杏春遲故自可聞之惜分景

柳

依韋煖氣發韶光陌柳絲絲漸染黃前日花朝方過了

便看物意為春忙

天成寺

雙峰闢天闕一逕入雲路尋奇紛彼新據座原吾故澄  
思會理趣即境摛藻向開窗寒料峭眺景春流露無為  
憶向來恍可欣始遇

惜松歌

萬松寺以松得名去歲蠹蝕  
松葉頓非昔觀詩以惜之

兩年不到萬松寺曉春乘興今來偶盤龍踞虎縱好在  
鬱翠流腴較昔醜僧云去歲即生蠹所以蒼株半枯朽

佛泯生滅付不知山無愛憎誰任咎咄哉成形壞亦隨  
榮譽已當毀應受不然山靈厭客來示盡枯禪以寂守  
木必先腐蟲生之疑增詎在碎玉斗植中壽客乃如斯  
不如斯者今知否

盤谷寺

隔嶂便欣松道劫

萬松與盤谷只隔一嶺過嶺而松翠如昔蓋地氣使然云

得門還

禮佛留真一窗碧岫經年古四野油雲釀雨新目色耳  
聲無盡藏退之李愿兩前人更瞻

聖藻輝巖穴石火流陰五十春

是寺鑄康熙四十四年  
皇祖賜寺僧詩

登雲罩定光塔作

平陵絕頂棲花宮詰曲雲逕盤巖松金輪月相此常住  
似說法華垂真宗五體投地大樂說忽瞻寶塔湧出層  
霄中十方如來乃恒河沙數彈指來聚一朵青芙蓉佛  
云開塔事如是塔中如來為分半座同我時忽忘登臨  
凡幾度惟聞梵網寶鐸錚錚落落鳴天風

上方寺

路便思清憩禪房倚石幽松端寒瀨泛澗底嫩泉流雲  
幻晴兮晦山常春復秋迴瞻定光塔真擬碧霄遊

山行即景

泉帶東西自高下山分向背變寒暄田盤四面皆方正

拱極都環紫蓋峯名尊

但看松姿皆入繢不須花發始吟春侍臣攜有清華侶

詩畫兼能為寫真

攜董邦達來令為田盤全圖兼欲修新誌也

奇峰不礙玲瓏影古寺真如委宛藏也覺吟懷無乃放

大都熟處未能忘

飛泉似掛古松梢雪練寒濤自磕敲釀作春雲剛滿谷  
頓希為雨潤東郊

晴

雲容纔作勢風力與之乖也識東郊潤終惟時雨懷昌  
昌露春腳謾響松釵若論看山色晴明自是佳

曉

遠墅聞雞鳴澹蕩春山曉西宇掛銀蟾東巒吐朱鳥益

然一谷暖山禽嘯疎篠物華縱未酣韶意惟斯好契理  
待萬幾運神籌四表

池上居漫作

宛在一泓春水新樂天先我得其津長篇妥貼都言盡  
率易由來未易臻

莫道山中無綠舫臨池也有受宜居米家書畫相衡校  
嵐靄烟波未此如

千相寺八韻

蒼巖路轉東初地翠雲叢既狹始開豁當前悟塞通逃  
禪孰龍象訪道豈崆峒自是乘春興聊因識化工鍾靈  
山有獨資始物惟同最愛苔皴綠未須花放紅遐思碩  
人軸且憩梵王宮相好雖千億根源蔽色空

偃松歌

飛空忽見垂蒼龍其上無雲惟碧峰之而抑搗玉光怪  
李老子兮黃石翁根不土胎性不屈盤盤蟠塙澗葱鬱  
譬如商顏肥遯流老而益腴卷綠髮春風秋月田盤山

鶴鳴鹿旅太古間大椿扶桑此其侶大夫受號嗟報顏  
東坡偃松斯臯祖成形疑是元黃剖今日應作如是觀  
公孫大娘劍器舞

翠帀亭六絕句

傑池列林扉相忽鳴石激是宜引思紛而益令神寂  
笠亭纏四柱萬概參於前小坐衣袂冷仙風下綠天  
陡壁不可登吾意與之上白雲阿那邊佺喬期來往  
嵐靄無定態松石乃益奇箇當忘言詮謝謝復奚為

土斷石壁立磊磊雉堞橫問從誰假借柳州小石城  
山莊駐五日林亭登一度卜築亦何為自問不解故

山莊西崦人家

茆屋高低外植援田收餘粒育雞豚惟勤耕績終年計  
不解詩書涉世論東帛蒲輪羞隱逸瓦盆柿酒長兒孫  
經過每為輕輿駐質樸風猶太古存

千尺雪再成

前朝含凍雪猶白今日舒絲柳漸青了識如斯在川上

流陰未肯為人停

訇濤流離瀉復渟聲難為狀色難形三間板閣虛窗靜

只合忘言注水經

熱河西苑及東吳到處風華具四圖試問得無紛色相  
宦光應道豈妨乎

再疊前韻題唐寅品茶圖

非關陸羽癖分茶偶試原欣沃道芽資椀筠爐值茲暇

田盤春色正和嘉

題董其昌婉璵草堂圖

草堂本自寫崑山真蹟誰教落此間  
名相由來無定著婉璵恰喜一般閒  
仲醇元宰交情厚李氏郭家設色艱  
我獨曹風憶彼美楚騷一例詠藜營

命蔣溥汪由敦董邦達修盤山新誌即令入山遊  
訪既畢事詩以示之

親切名山全體圖舊乘檢校正乖誣名賢勝蹟思傳誌  
其不傳能誌取無

石林精舍

春松翠欲飄古石飛疑墜允宜風月佳未許桃李廁歌  
案讀典墳義皇興企思

雲淨寺

尋春喜晴和入山窮窈窕陽巘已綠縕陰雪猶白晶雲  
淨佛所都青蓮色相表盈盈功德泉身心一以潔載登  
皮經閣萬慮澄三藐迴望向來途深雲不可討

東竺庵見杏花始開

日日盼花開花開乃在此不藉女夷權應是天龍喜竺庵谷向陽條風撻昌蕊爛漫亦底須瀟灑真佳矣佛咲物皆春當前悟妙旨

少林寺

精藍盤谷口縱望納徐無萬里太行麓千年雙檜株中  
雙檜最古蓋  
千年物也 稍停參淨業隨意作清娛得句還前進名

山寧可孤

古中盤

盤之中造盤之阻綠嶂峩隱青蓮宇到來精舍據其巔  
春靄山雲互吞吐老僧面比瘦石枯南宗棒喝全茫乎  
住山却是本來相何用詎詎辨有無松籟澗琴皆淨致  
一牕延得千峰翠巖花放不入時妍由來物各從其類  
仙風謾謾吹我裳便尋歸逕我馬黃乘興應留興不盡  
偶遊亦屢遊毋荒

冷然閣

巖樓倚半空月宇納天風攬景真無盡會心迥不同石

泉銀瀉峽蕙草綠抽叢壺裏年常靜人間春漸融

雨花室

三春臨靜寄五日作清娛每到吟將遍茲來興復殊交  
窗嵐影翠入座栢陰孤試問維摩詰斯還著也無

盤山啟蹕之作

言旋清蹕別仙莊五日春遊毋乃長知爾何須亟來往  
於斯未可久徜徉迴瞻雲罩中天直取近西盤十里強  
詩緒紛投吟不盡名山二酉暫教藏

題方鈞袖珍山水卷

烟林野艇

綠樹蔚溪烟人家隱烟樹野艇載羊裘沿溪自來去

柳墅蓮香

玉露下銀塘芙蓉自在香粉本定誰取依稀萬柳堂

晴蹊粉籜

琅實堪飼鳳烟梢欲舞龍忽似春叢裏韜光之所逢

江村晚照

秋谷幾村靜夕陽千樹披入江翻石壁杜老句真奇

古木幽篁

幽篁既瀟灑古木亦振奇恰似嵇與阮相逢把臂時

松巖飛瀑

寒濤及雪練映帶翠屏裏造自田盤來所見多相似

旋蹕詣

暢春園問

安

行春迤邐返蘭輿先詣仙園問

起居敬悉

高年福履鬯

簪簪爵躍喜何如



御製詩二集卷四十六

總校官庶吉士臣侍朝

校對官庶吉士臣陳文樞

謄錄監生臣趙友彬

欽定四庫全書叢要

集部

御製詩二集卷四十八



詳校官原任編修臣徐立納

集部

欽定四庫全書薈要卷一萬三千三百七十四

御製詩二集卷四十七

古今體八十六首

甲戌三

偶題

蘇李真稱神理超  
曹劉未覺古風遙  
三唐已自相沿下  
何用流波說四朝

詠漢玉圖章

良瑤誰得亂繆篆  
獨超羣抑埴傳遙代  
瑰奇煥秘文堯

年垂寶露虞旦爛卿雲介紹客卿侶彬然挹古芬

題張宗蒼畫

蒼山紅樹裏流水側崖顛獨倚危亭坐如安空界禪遙  
源白雲外別業綠筠邊世上無名姓誰希續列仙

玉泉山見新耕者

遲日尋芳到玉泉含胎花信欲嗎娟虛窗納遠聊披景  
沃壤融膏見種田已盼雨靈亟顚若乍看土潤為欣然  
山容水態田盤似所得今朝迥勝前

山桃始開

嫣然度索放和嬌頭踏羣芳報節韶只有東風偏慣妬  
蓬蓬底事不相饒

題張宗蒼夏山圖

好山濃若滴灌木翠如流雲起知將雨風來乍似秋展  
書惟靜客鎮日坐高樓何必稱王粲曾無羈世憂

湖上

湖上青韶漸可憐新波晴旭漾澄鮮花將放蕊明思雨

柳已舒條暗惹烟踏浪錦鳬空際去尋芳粉蝶密中穿  
溪山好值春光富妙理清機日細研

白山桃

綠萼已稱謝脂粉素華偏自舞婆姍不因嚴節從頭校  
幾與寒梅一例看

鳳凰墩放舟由長河進宮川路攬景雜詠

一篙春水漾文舟便泛長河達帝州山色溪光相罨畫

湖心小憩鳳凰樓

青蒲白芷欲浮波柳態花姿即漸多底識明湖不相讓

六橋一帶遠烟拖

垂虹迸水落銀塘小擬洪湖石堰長恰有侍臣董事返

秋災細訊厪維揚

時總督策楞董菜南河堤工事竣復命隨侍舟次

幾曲川途綠柳堤遙聞鐘磬出招提今朝不必維舟訪  
默識禪房有舊題

瓊島春望

太液池邊瓊島嵬登臨縱望氣佳哉新蒲弱柳高低綠

杏藥桃疑次第催玉筍含陰隱壺嶠銀奩倒影畫樓臺  
萬家春樹皇居拱生計籌量日幾迴

偶成

無稽及弗詢勿聽亦勿庸重華以命禹心傳繼神宗仲  
尼稱好問邇言察用中好察隣庸聽邇言詎盡公典傳  
似枘鑿繹思異實同

即事

曉起濃雲布四宇無何堦堦變終風土膏固不妨春種

未免先時意已忡

暮春漪瀾堂

岩堯峙穹塔衍漾浮液湖畫樹疊峯稜綠縠周堂除白  
烟帶嫩柳紫茸發新蒲續藻潛遊鱗梯浪起飛鳬妙趣  
上下察神詮動植俱三歎吾與點言志何傷乎

三月三日

逼閏節猶寒上巳花始發馬射古所稱祓禊今久歇王  
謝文會豪張庾佳辭越縹喜春雲濃可惜終風勃無心

玩芳華惟是蜃耕岱

錢維城林塘泛艇

葉舟泛空闊去住隨所如不擬瀟湘意嫌襲弔三間

梅有後桃杏而開者詩以嘲之

盆梅本自放嚴冬但是薰培出溫室山襟牡丹冬亦開  
豈曰耐寒其本質南方有梅北方無造物異視詐理乎  
牆根向暖試種植頗得滋榮三五株緋桃絳杏爛漫矣  
纏綻蘂珠一兩爾或云氣候究不同江國原報春光始

若然遇寒終變節逐炎何以稱高士隱覺清友向人言  
南方之強理如此

御園暮春即事

年來翠輦每乘春農扈瞻蒲事省巡仙苑恰欣值清暇  
可無藻句答芳辰

山桃正放樹梢紅洞口源頭宛轉通慣被封姨作媒蘖  
蓬蓬鎮日厭顛風

鳴鳩喚雨鵲呼晴愛聽鳩音厭鵲聲宴坐閒齋參耳觀

物無分別概人情

新波曲岸板橋橫仙樹真花景正明緩棹湖心成靜寄  
米家書畫不相爭

汀蘭岸芷吐芳馨漪碧偏宜近水亭未可春園亟行樂  
周書無逸每書屏

纔喜御園春好看又愁南畝雨嫌遲却憐九十韶光裏  
放眼舒眉付阿誰

含經堂

惜陰遵古訓克己陶今情無逸惟勵志有亹常研精明  
鏡待旃摩鑠金資土型行知則廣大尊聞則高明歌案  
味道腴轉憶書窗橫

雜言

黃蘖其味苦咀嚼生微甘白蜜滿口甜微辛其中潛元  
氷含陽溫烈火藏寒炎翼者兩其足齒者角難兼高明  
鬼闕室天道每益謙百慮或一失芻蕘有理談

讀平原君傳

公子稱最賢食客至數千高樓臨民家嬖者行樂躊美  
人忽臨見倩兮巧破顏明日嬖者至謁君抗辭前願得  
笑者頭君哂未許焉舍人稍引去怪問始知然愛色而  
賤士誰肯相周旋爰斬美人頭謝罪自造門門下乃復  
來相傾文歇間卒得穎脫力定從自楚還一笑知何人  
其事況經年美人誠然乎胡乃致客還史公每好奇於  
斯見一斑

湖上雜詠

山桃報道爛如霞風定乘閒攬物華已藉吹開自吹落

三分塵土一分花

望蟾閣外放烟舟澄照欣看鏡裏遊綠柳紅槁隄那畔  
鴛鴦鷗鷺鷺滿汀洲

諸蘭岸芷郁青青萬頃波光漾碧舟便是明湖春暮景  
謝他雜沓管絃聽

澹沱溪烟接六橋雙湖夾鏡盪蘭橈玉泉不是言遊懶  
咫尺波心落翠標

藻鑑堂

畫舫過長隄  
鏡湖環迴榭于焉可小憩  
天水光上下輕  
烟柳絲胥嫩  
日花枝亞飛躍  
契靜觀動植含神化  
溯洄駕言旋吾寧  
此多暇

景明樓

隄亘湖心上有樓昆明烟景坐中收  
春秋無盡風兼月  
左右何須女與牛  
魚鶴鳥自飛躍波光雲影相入沈

浮岳陽記語當前景吾亦同之  
歷先去憂

時哉行

惜以分寸較聖賢內典更云彈指間一剎那頃來今去  
堂堂去者誰見還日中必烹操刀必割白圭趨赴鄙哉  
貨殖齊人有言曰雖有鎔基湛靜安舒者戒於後遲行  
夏乃仲尼之訓吾惟後天而奉之

題張宗蒼畫

如滴春山美欣欣總向榮崖枝改舊觀去澗水發新聲  
雲塢數家靜風帆幾舸輕層樓俯空闊興發謝宣城

再題年益擣衣圖仍用謝惠連韻

有序

是卷題於乾隆丁卯比戊辰再題則已遭

先孝賢皇后之感迨今甲戌倏已七易星霜矣寒食

前一日適值忌辰追念前徽撫懷節序披圖觸緒

蘭館猶新用寫悲懷仍賡舊韻

鴻龍運玉斗紀序相嬗催新烟引綠榆免目吐高槐邇  
日頻望雨愁卜桑鳩啼孰謂斷魂節憶昔別椒閨東巡  
禮岱宗鳳翫聊相攜大故遭登舟銀漢不可階茲辰值

忌辰慙慙余懷悲遣緒展斯圖間有舊題傳神擅老年  
宛似秋氣歸佳人閑掃粧相聚擣寒衣即今重織絰親  
蠶館復開何當盆手三愴念前人非

寒食日作

二十四番風欲遍一百五日春將深花開花落亂人眼  
雲聚雲散愁予心後樂惟希三月雨先憂益惜分寸陰  
烟景不乏佳麗趣邇來何事慵登臨

恭奉

皇太后昆明湖觀水獵

水虞應節習昆明綰獵輕舟罨練旌漢武唐堯溯往蹟

燕南趙北效

前行

淀池水園次茲以昆明近而便故奉

皇祖時歲舉行之朕亦偶試二皇太后觀之舉

求便衆咸稱樂取戒多鷗未致驚景麗春和欣日永福

增

慈履視滄瀛

由玉河復至玉泉

聊因習衆水圍收幾曲遙源一溯遊夾岸菜花香遞送  
黃於金菊綠於油

卧波橋影亘銀川寒食風輕穩度船賜火那須資蠟燭  
綠榆無樹不新烟

山色花光續靜明華滋館名小憩足怡情尋春向者無多  
日錦埭新看有落英

詠翠雲堂雙栝

兩樹盤盤蔚翠雲四時無改自超羣隱如俯視羣芳道

任爾千紅萬紫紛

永世名堂占翠雲胎仙欲下更呼羣春松比似還差勝  
未致和家擬議紛

課耕軒

疏軒倚秀巖俯暢名課耕溪田帶左近引水藝稻杭牆  
外即高田禾麥千畦呈向者偶憑憩欣聞叱犢聲今來  
再騁目綠剝已滋榮及時資好雨庶可希西成豈辭欲  
速譏惟是先憂并濃雲看漸徂惜哉心怦怦

詠史

范叔因說力擔石乏自資夤緣事須賈客乘從之齊牛  
酒不敢受賈聞猶怒私告相相亦怒折脇行刑笞佯死  
卷以簣乃得免禍危姓名易張祿伏匿恐人知幸得鄭  
安平薦剡歸王稽橐載避秦相待命復歲餘叶上書慢  
言外觀王俯仰姿計行乃言深封侯不逾時微行誌須  
賈綿袍憐賜之御以入相府先入怪久篤門下告之故  
肉袒謝罪遲三罪既庭數馬食縱以歸德必償一飯怨

亦報睚眥。叶安平旋降趙王。稽坐法誅。叶蔡澤遂適秦相位竟奪其機謀。誇百變時窮安能為是。始還是終小智真大癡。

自訟

行如畏難安期進詩務求多定鮮精我每於斯未能信  
聊因自訟驗平生

題董邦達西江勝蹟

滕王閣

帝子長洲烟水渺仙人舊館畫圖新千秋風月是公物  
一晌披探即勝因凝看西山將作雨誰憐舞席久生塵  
片帆風利江樓近似送龍門作記人

百花洲

澹蕩百花洲林泉與靜謀已看文石立便擬藻船浮小  
憶鴛鴦樂曾登烟雨樓一般天水濶千載畫圖留奇境  
曾何盡遊踪可遍不問誰斯結構聞說宋商丘

北蘭寺

平陵雉堞法王宮。微微仙梵疑飄空。  
僧房花木深蔚秀。愛彼幽篁曲徑通。  
因迥為高就卑下。自然妙理標禪宗。  
襟三江北蘭寺。經始斯者南豐子。  
誰謂伊人不解詩。江聲月色真詩髓。

鎣江樓

鎣江百尺聳岑樓。下俯潯陽日夜流。  
雪浪至今淘不盡。高眠逸致想蘇州。  
韋應物詩有始罷永陽  
守復卧潯陽樓之句

歸宗寺

山陰已自佳清賞興未已覽勝愛廬阜卜宅因於此旋  
捨居梵僧清池心共止誓墓有高節歸宗示淨旨餘事  
付龍跳墨雲蘸湫水

秀峯寺

秀甲廬山秀元標淨土元寶華飛傑閣珠瀑掛前川俗  
却三千里僧安六度禪至今傳迥句祇有李青蓮

萬杉寺

大超手植萬杉默然不辯聖凡何必元珪說法山神示

蹟東巖

三峽澗

水石相遭逕奇變不可窮擬展蜀江看

石渠寶笈藏李公麟蜀江卷盡

三峽瞿塘之勝瞿塘是異同

棲賢寺

李渤讀書處今為釋氏居棲賢存故號無聖演新書珍  
重昌黎輩排斥定何如

白鹿洞

奧區五老峯之陽仲季偕隱潛德光厥有白鹿性馴良  
羶鄉名勝爰始唐後來朱子守南康葺治書院開講堂  
五教四事規制詳溪名貫道水洋洋上溯洙泗其源長  
興賢淑世予心藏

東林寺

白蓮當日名社青山萬古留姿翻經欲修淨業落蹄已  
涉有為靈運肅然伏意淵明忽爾攢眉惟有巖花溪樹  
識得三笑如斯

吳章嶺

吳地此雄關，廬山維北轉。巒崿羅層峰，盤迴架陡棧。  
棧若無路行人為，躅步嗟哉名利子。冒險紛來去，來去  
古復今。吳章自碧岑，陸文不可作董法。猶堪尋堪尋，巖

壑表一一供幽討，借問轆車迴桃李。收多少

癸酉秋命董邦達典

江西鄉試經歷諸勝因成是圖

微雨

微雨剛成寸，雲徂旋放晴。較恒風自善，曰及節非情。檐

瓦垂輕滴階茵潤始萌也知時令早預盼每心怦

永定門外

一夜雲容聚散爭曉來春宇麗新晴輕烟宿潤相融冶  
頗喜青郊物向榮

土囊風息不揚塵微雨從看捷有神恰值鳴梢向南苑  
試蒐蕪為一行春

羣稱地潤知誠否畢竟親覘始慰心却惜一犁猶未及  
綠疇何以發秧針

行園

南苑臨春暮青郊試小蒐略觀虞者技宛憶少年遊勞  
衆寧堪亟攜孫自有由今年兩孫皆八歲因  
擣以來示之度也翻犁見耕

父諧穡每延留

風

卓午山吐雲復引望雨意宿潤欣稍佳優霑希更繼少  
頃乃變風壩然作氛翳寸澤曾幾何而禁吹萬恣罷圍

坐行宮踟躇愁弗置

蔭榆書屋晚坐

杏朵舒妍蘭放馨酒然書史幔紗青庭榆影淡月初上  
院柳烟濃風乍停適者戚欣真暫幻少年俯仰已無形  
祇餘架上芸編在隨意披翻悅性靈

謁元靈宮

中天端嶺鬱羅臺虎豹重關寶扇開已看卿雲護丁甲  
更希時雨命風雷真花繞砌新韶秀仙構扶霄舊實枚  
敬仰

穹碑閱三世祈年此志每虔來

德壽寺

芳甸春明碧草萋乘閒淨業覓招提到來俯仰足新趣  
著處徘徊有舊題

春曉

澹蕩離宮曙禽聲出樹遲露滋花氣馥旭影柳梢蕤理  
趣清平旦春光及暢時未遑觀景物九寓入壽思

即事

次第封章畢指揮青郊草淺試春園設如幕遇姚元景  
咨事安能待獵歸

吉驄駿姿破晨涼略欲親勞亦戒荒輸與廿年前意氣  
揮鞭數肋射銀麋

雙柳依然窄綠絲陌旁駐馬立移時去年文賦從頭讀  
不更臨風構藻思

裕性軒詠玉蘭

一樹當庭萬玉蕤春風別館及芳時色香兩字無餘淨

繩几憑參性所宜

續寫春光得爾神去年題句壁間新

去歲來此  
亦值花開

較量含

韻齋前樹清詠饒他兩度春

舊作有裕性軒為含韻齋之句含韻齋圓明園賞玉蘭處

也

### 曉陰

曉陰重春宇佇看久徘徊潤澤青郊縱霏微數點纔祝  
風其莫作恐霽又云開點筆艱佳句惟應道惜哉

### 夜雨

入夕聞風息深更報雨零露零遙想像淅瀝細酬聽喜

浣花蹊塢希滋麥壠青少時勢徐止欹枕意無寧

春曉即景

問夜無眠尚衣早三驅意足命歸輿中人縱是頻來往  
未及躬親侍

起居

溶溶曉月漏輕雲古樹禽聲傍曙聞昨夜雨纖風郤驟

滿庭紅惜杏花紛

豐臺迤邐接涼水宿雨雖微意已佳綠竹緋桃護村舍

幽情往往繪秦淮

率題

至人不夢勞人夢吉夢常稀噩夢頻寄語槐安未醒者  
幻猶如此況其真

漪瀾堂

弓樣圍樓鏡樣波中堂儼是影清娥漫言七寶瓊居綺  
不藉千枝桂樹姿檐際光翻銀液藻窗間聲按羽衣歌

獨予水鑒因心切澄照何當惕對多

建福宮詠紅梨花

李花太白海棠紅斟酌穠纖著禁叢最是麝風琳月下  
仙人遙在蕊珠宮

齋居

齋日視祭差

大祭三日中祭二日

致誠應無二况茲饗先農孰非

為民事暮春諺吉亥將臨千畝地土膏雖潤升時雨乃

艱致豈不日密雲未行徒亂意

祭

先農壇

歲歲躬耕藉勤農

皇考貽

松壇先肅禱穀寶與豐綏琯玉調韶濩山龍式禮儀春  
雲頻聚散時需切翹思

文徵明春山烟樹圖

春山秀冶含姿春樹烟融雨滋記得楓橋那畔所逢往

往如斯

題張宗蒼山水

佛鉢中青萬葉葉排空翠影落牕虛白雲谷口仙家竈  
黃樹村頭靜者居石穴溶溶出鍾乳峰均艤艤矗箖箊  
伊人肥遜真無悶不是窮愁自著書

御製詩二集卷四十七